


**Seni Preseten  
Henry B. Eyring**  
Aemonun Chon Aninis non  
ewe Aewin Presetensi



# Pwara non Pekin Nimenimoch

**E**u nein ekkewe popunapen manau won ei fonufan ina pwe sipwe pwäratä ngeni Kot pwe sipwe anneasosichi an kewe annuk nupwen mi namot pwara. Sia pasini ena tes non ewe nenien ngun. Nge eu ne unungatin ekkewe chon nang mi u ngeni ewe nongonong pwe repwe weri sossot non pekin manau won fonufan me mi wor eu tufichin ar repwe tur.

Me mwen sia uputiw, sia pwisin sinei Kot ewe Sam me Noun we, Jises Kraist. Sia tongeni kuner me aunsening ngenir nupwen ra aitikich me pesei kich. Iei mi wor eu epet mi nom non tupuach kewe me ach chechemeni. Mi wor an Setan, ewe semanapan chofo-na, pochokun pokiten mi namot sipwe kuna ennetin pwisin kich seni ekkewe mesen nuku, nupwen sia sossot non pekin inis.

Mi wor watte aninis mi awora ngeni kich ekkis pwara non ei manau. Ewe aninis mi napanap mi ewe Achasefan an Jises Kraist. Pokiten an kewe föfför, tipis mi tongeni totonuno non ewe konikin paptais. Sia tongeni asofosefanni ena efeioch nupwen sia angei ewe sakramen non nuku me ewe ekiekin aier.

Niffangen ngun mi pwan eu aninis. Sia angei ewe Ngunun Kraist nupwen sia uputiw. Iwe a ngeni kich ewe manaman ach sipwe sinei ika pwe sia fini eu

mettoch ika pwe epwe emwenikich ngeni manau ese much. Ekkewe pukfel ra fakkun emwenocho kich nupwen sia aneanir ren ewe Ngun mi Fel a chiechi ngeni kich.

Ewe Ngun mi Fel a mutata ngeni kich pwe sipwe pwäratä ach kinisou me tingor ren aninis non iotek ren fatafatochun me sineinap sia fen weri nupwen sia non-nom ren Semach won Nang me pwan mine epwe nom rech nupwen sia niwinsefan ngeni I. Ena poraus fengen nefinach me Kot a aninis ne asueno niuokus seni netipach kewe me a apochokuna nuku me tong an Semach won Nang me Jises Kraist.

Ewe pristut mi pin a ngeni kich ewe pwara non ach angang. Non ekkewe efeioch sia angei ewe manaman ne angang ngeni noun Kot kewe semirit me pwan pochokun ngeni met mi ngaw. Nupwen a kokkori-kich ngeni angang, mi wor ei pwon ngenikich pwe io mi etiwok, iwe Kot epwe pwan nonnom, me epwe feino mwom. Epwe nom won penie mwanin me peni fefinan, me Ngunun epwe nom non netipom, me noun kewe chon nang repwe nom unukum, ne apochokunok (nengeni D&C 84:88).

Mi wor popun an ewe Soufos Joseph Smith niuokus non an angang. Nge Kot a ngeni pwara me pwan ei pwon ren ewe nenien appiru an ewe Masta:

A apasa pwe ika Joseph epwe turunong me non ewe pwang, are me non poun chon nini, me ika pwe epwene mano; ika pwe a turunong non ewe annonnon; ika chommong mi u ngeni i; ika asepan watte a tori; ika nang a winiti kiroch, me mettoch meinisin a u ngeni i; me pwan, ika enn a suki awan ngeni i, epwe sinei, nei at, pwe ekkei mettoch meinisin epwe kaeo seni, me ra fis fan iten ochun pwisin i.

Ewe Samon a ereni pwe ewe Noun Aramas a nom fan ir meinisin. Me a eisini ika pwe a nap seni I? (nenigeni D&C 122:7–8).

Kot a ngeni kich watte aninis ne oturau niuokus me a ngenikich pwara, ren met chok sipwe weri non manauach. Nupwen sia eita ren An aninis, a tongeni ekikicheta ngeni ena manau ese much mine sia kutta.

## AFANAFAN SENI EI POROUS

Jises Kraist, ewe Masta Sense, a kapas eis fan chommong ne pesei ngeni aramas ne ekieki me aea ekkewe nongonong a afanafana. . . . Meinisin an kewe kapas eis mi efisata ekiek, kutta non pekin ngun, me pwon” (*Teaching, No Greater Call* [1999], 68). Kopwe ekieki me eisini ekkoch kapas eis epwe anisi aramas ne weweiti me aea ekkewe nongonong mi nom non ei poraus. Ren awewe, ka tongeni eisini, “Met pisekin aninis Kot a ngonuk ne asueno niuokus me awora ngonuk pwara?” are “Ifa usun Kot a anisuk ne pworacho ngeni om niuokus?” Pesei ngeni aramas repwe ekieki usun ponuan me mwen ra kapas.

## SERAFO

### Ese Wor Emon mi Unusoch

Seni Shauna Skoubye

Ua achocho ne winiti usun chok Nifai: anneasochis meinisin, nukuchar, me wesewesen achocho non pekin ngun. Non ai ekiek Nifai mi ewe nenien appirun och mi napanap. Ekkoch mettoch chok mi och ngeniei nap seni ewe ekiekin mamarita epwe winiti usun chok i—are poputa ne angei ekkis chok ochun.

Fan eu ran ua ekkis osukosuk, a feito seni ai memef pwe use och. Mi watte ai achocho me ai mochen ne föri chommong mettoch. Nge usun pwe use feino ia mine

ua mochen. Seni kechiwen tufichingaw, ua pwäratä ekkei memef ngeni semei. A muttir uta, fetan ngeni ewe nenien puk, me a angei echo nein noun kewe kapien ewe Puken Mormon. Ese fos, me a suki ngeni 2 Nifai 4 me a poputa ne aneani wokisin 17.

Ua mefi usun chok nge fifi a ku inisi nupwen ua ausening ngeni ekkei kapas pochokun non mine a kapas pwe a emon mwan mi netipechou. A fakkun chommong ai ekiek. Ifa usun Nifai, ai we nenien appiru, a tongeni apasa pwe a “netipechou”? Ika pwe i a netipechou, iwe nge met a fisi ngeni ei?

Sefaniti, ewe fifi a ku inisi nupwen semei we a aneani wokisin 28 non mine Nifai a ereni ngunun, epwe pwata! Me esap chuen nom non tipis. Ua mefi pwe usun chok ekkewe kuuchun rochokpwak non ai ekiek mi suuno me a pwäratä ewe kinamwe me ochun nang mi tin ewe akkar. Ese tufichin awewei napanapan ei wokisin a asarama nguni. Ekkoch chok wokisin mi urono nguni ren watten epinukunuk, pwäratä, me pwapwa usun chok ei.

Non woksiin 30, Nifai a apasa met chok ua ekieki, non chok kapas mi fakkun ningoch. A apasa pwe ngunun epwe pwapwa non I ewe Kot me ewe foun an manau ese much. Ei wokisin a uwei ren memefin kinamwe me kinisou ren an ewe Samon chen me tong.

Semei we a esipano ewe puk me a awewei pwe ekkei wokisin mi iteni ewe könun Nifai. Mwirin a aitie pwe ekkewe aramas mi napanap me won fonufan rese unusoch, me mi namot pwe ekkei aramas repwe esinna ngawer kewe are repwe uren namanam tekia me, iwe, resap napanap.

Ua weweiti. Pokiten chok a wor ai apwangapwang esap wewen pwe use tongeni winiti usun chok Nifai. Ai esinna ai kewe apwangapwang a etufichi ngenikich pwe upwe arap ngeni ochun Nifai. Nifai a napanap pokiten, a anneasochis me nukunuk, a pwan netip tekison me a tongeni esinna an kewe tipis.

Seni chok ena fansoun, ua fakkun sani ekkei kapasen Nifai. Iteitan fansoun ua aneanir, ua mefi ekkewe chok pwapwa me pwäratä usun chok ewe aewin fansoun ua aneanir. Ekkewe wokisin ra kön ngeniei pwe ngang emon noun Kot fopun, me ua tongeni föri nap seni met chok ua tongeni ekieki. Ua sinei pwe ika ua nukunuk me achocho nikitun ngeni, mi wor chommong efeioch mi wor ngeniei.

## SEMIRIT

### Niffang mi Awora Ngenikich Pwara

**P**reseten Eyring a erenikich usun chommong efeioch mi awora ngenikich pwara. Anneani iteitan wokisin fan, me makkei iten ewe niffang non ewe neni. Poraus fengen non om we famini usun ifa usun ena niffang mi tongeni awora ngonuk pwara.

1. Föfför 22:16 \_\_\_\_\_
2. 2 Nifai 4:15 \_\_\_\_\_
3. D&C 59:8–9 \_\_\_\_\_
4. 2 Nifai 32:5 ; John 14:26–27 \_\_\_\_\_
5. 1 Thessalonians 5:17 \_\_\_\_\_

# Apochokuna Nuku non Kot ewe Sam me Jises Kraist seni Pwisin Kaeo Pukfel



*Asukuna ekkei pukfel me uwekisin are, ika mi namot, ekkocho nongonong epwe efeiochu ekkewe sister ke churir.*

*Apasa om kapasen pwäratä usun ekkew annuk. Murt ngeni ekkewe ke churir repwe apasa usun met ra mefi me kaeo.*

“Nupwen ua keran kofot, . . .

Emon a tingore ei pwe upwe fiti eu fansounen möngö fan iten meinisin ekkewe Fin Anisi non ai we wart mi fen aneani ewe Puken Mormon are eu puken uruon Mwichefen. Ua ekkis chipwang non ai aneani pukfel, iwe ua tongeni fiti ewe fansoun möngö pokiten ua aneani ewe puk mi kukkun pokiten mi mecheres me ese namot watte fansoun. Nupwen ua möngö, a wor ai memef pwe ina mo pwe ewe puken uruo mi och, epwe fen och ika ua aneani ewe Puken Mormon. Ewe Ngun mi Fel a pesei ngeni ei upwe ekkesiwini ai achocho ne aneani pukfel. Ena chok ran ua poputa ne aneani ewe Puken Mormon, me use fen kouno. . . . Pokiten ua poputa ne aneani ekkewe pukfel iteitan ran, ua kaeo usun Semei won Nang, Noun we Jises Kraist, me met mi namot upwe föri ai upwe winiti usun chok Ir. . . .

“ . . . Iteitan fefin mi tongeni emon sensen ewe kapas allim me non

imwer we, me iteitan fefin me non ewe Mwichefen a namot an weweiti ewe kapas allim pwe epwe emon sou emwen me sense. Ika kese fen kan aneani ekkewe pukfel iteitan ran, kopwe poputa iei me sopweno om kaeo pwe kopwe monota ngeni wisom kewe non ei manau me non fansoun ese much.”<sup>1</sup>

*Julie B. Beck, Presetenin Fin Anisi unus.*

“Kaeo ekkewe pukfel epwe anisi ach kewe kapasen pwäratä me ekkewe kapasen pwäratä an chon ach kewe famini. Nouch kewe semirit ikenai mi marita me a chommong mongungu mi pesei ngenir ar repwe nikitano met mi pung me achocho ngeni, ekkewe pwapwan fonufan. Ika pwe mi wor ar nongonong mi pochokun non ewe kapas allimen Jises Kraist, eu kapasen pwäratä ren met mi ennet, me ar mochen manau wenewen, ir mi tongeni tur me ren ekkewe pesepes. Wisach kewe epwe apochokunar me tumunur.”<sup>2</sup>

*Preseten Thomas S. Monson.*

“Sia mochen pwe ekkewe fefin repwe sineiochu ekkewe pukfel. . . . Mi namot eu chiechi fengen ren ekkewe ennet ese much fan iten pwisin en, me ren popun om kopwe aiti noun kewe semirit me pwan meinisin ekkewe ekkocho repwe sinei en.”<sup>3</sup>

“Sia mochen pwe imwach kewe

## **ANINIS REN FEFIN CHON AMWA**

Non om fansoun chufengen, kopwe pwonueni ekkewe kapas eis me aea fengen ekieki me aea ekkewe pukfel. Kopwe kapasen pwäratä ifa usun kaeo pukfel mi apochokuna om nuku. Kopwe tingor ngeni ewe fefin oua churi epwe poraus won ifa usun an kaeo ekkewe pukfel mi apochokuna imwan we me an we famini.

## **AMMONETAN EMON ME EMON**

John 5:39

2 Timothy 3:14–17

2 Nephi 9:50–51; 31:20; 32:3–5

D&C 138:1–11

repwe efeioch ren fefin mi sineinapei ekkewe pukfel—ina mwo ika ka anaemon chok are pupunu, kukkun are watte, nipich are nonnom ren famini. . . . Oupwe winiti chon sinienap ekkewe pukfel—esap an epwe efeingawa emon ren kapas, nge ekireta!”<sup>4</sup>

*Preseten Spencer W. Kimball (1895–1985).*

## **ESINESIN**

1. Julie B. Beck, “My Soul Delighteth in the Scriptures,” *Liahona*, May 2004, 107–9.
2. Thomas S. Monson, “Three Goals to Guide You,” *Liahona*, Nov. 2007, 118.
3. Spencer W. Kimball, “Privileges and Responsibilities of Sisters,” *Ensign*, Nov. 1978, 102.
4. Spencer W. Kimball, “The Role of Righteous Women,” *Ensign*, Nov. 1979, 102.

© 2010 seni Intellectual Reserve, Inc. Meinisin pung mi kawor. A för non Amerika. Kapungunon non fasun engenes: 6/09. Kapungunon chiakun: 6/09 Chiakun *Visiting Teaching Message*, March 2010. Chuukese. 09363 901